

TIN UN SOLUSHON!

Ta klaro ku e tragedia teribel di AIDS ta pinta di bira un katastrofè. E no solamente ta mata su víkteman, ma e tambe ta bira un peso ekonómiko astronómiko pa tantu e individual, su famia i gobièrnu.

Tin un solushon! Ma tristu ta ku poko komunidad, poko komishon di AIDS, poko gobernante, poko gobièrnu, i poko pais ta dispuesto pa asept'é. Paisnan ta hogando, miéntras nan gobiènantenan, konsehá pa "ekspertonan," ta sera wowo pa e faktonan i ta mantené un grap firme riba kondom, konfiando e supuesto salbadida di latèks pa un reskate milagroso. Aña tras aña, nan ta toka e mésun kansion, manera un disko ku a pega, dunando e poblashon un sintimentu di siguridat falsu ku nan por gosa sèks bai gol sin sufri e konsekuensianan. Ma nan ta sera wowo i bira kabes pa e echu ku aña tras aña miles di hende ku a balia riba nan piesa a muri **pasobra** nan a sigui e konseha di e "ekspertonan."

E ÒNIKO SOLUSHON SIGUR

Tin solamente un bèrdadero solushon pa AIDS i otro enfermedatnan venérik. E no ta un solushon popular! E ta un solushon ignorá, rechasá i kalumniá pa hopi hende. E no ta gustá pasobra hende ke sasia nan deseonan seksual segun na ta haña ta bon. Ma di bèrdat, e ta e **úniko** solushon!

E ta un solushon masha simpel. E no ta kosta ni un depchi. Ma esei no ke men ku e ta barata i fásil pa implementá. Di bèrdat, pa e individual e por ta kostoso i ta demandá disiplina propio konstantemente.

Kiku ta e solushon? At'é aki den poko palabra: Apstené di tur aktividat seksual promé ku matrimonio, anto tene relashon seksual solamente ku bo kasá despues di matrimonio. Pa ser mas spesífiko, nos por mensioná kuater punto ku ta nesesario pa evitá enfermedat venérik:

1. Apstené di tur kontakto seksual promé ku matrimonio.
2. Kasa ku un persona ku no ta infektá ku un enfermedat venérik.
3. Keda fiel na bo kasá bida largu.

Pasobra tin hende ku ya kaba ta hasi sèks ku nan amante, nos tin ku agregá un punto adishonal:

4. Pone un paro inmediato na tur kontakto seksual, apstené di esaki por komplotu te matrimonio.

Ta un echu ku si bo ta mantenébo na e promé tres puntonan, ta improbabel ku bo lo kontagiá un enfermedat venérik! Nos ta usa e palabra "improbabel" na lugá di "impusibel" pasobra den sierto kaso tòg ta pusibel pa ser infektá, manera dor di un inyèkshon ku un angúa infektá, kontakto ku sanger, òf un transfushon di sanger kontaminá.

E dirigente di Merka su pólisa médiko algun aña pasá, Everett J. Koop, a deklará: "Edukashon kontra AIDS (komo parti di edukashon seksual general) mester mantené monogamia den

matrimonio komo algu deseabel i digno...Mester siña hóbennan ku e mihó prekoushon ta apstinensia te ora ta pusibel pa establese un relashon mutualmente fiel i monogamo."^T1^T Pues, e solushon pa enfermedatnan venérikò por ser bisá den dos palabra: puresa moral.

Apstinensia, puresa moral, moralidat, birginidat, èts ta palabranan ku ta repudiá i renunsiá awendia. Nan ta pretendé ku ta impusibel pa eksigí moralidat di hóbennan. Nan ta hasi komo sifuera tineidjernan ta bestianan hambrá pa sèks, ku ta na miserikòrdia di nan hormonanan, ku no tin ningn klase di abilidadat pa ehersé disiplina propio.

Ma echu ta ku hopi hende ta masha hipókrita ora ta trata ku puresa moral. Ta un realidat ku nan ta mantené un stèndèrt dòbel. Hopi di e mésun hendenan aki ta kontradisí nan mes den un otro área.

Pensa un ratu tokante nos programa anti-droga. Si nos ta sigui e mésun lógika aki, anto nos mester rasoná tambe, "Tur hóbèn salú i normal ta bai usa droga tòg, p'esei mihó nos duna nan e informashon ku nan tin mester pa nan por tuma sierto prekoushon ora nan ta usa droga. Siña nan presis kiku pa hasi pa nan por tuma droga na un manera responsabel."

Ridíkulo! Ora ta trata ku droga, nos tur ta di akuerdo ku nos mester siña nos yunan pa bisa "Nò!" **Apstinensia total** ta e **úniko** ruta ku por garantisá ku un pèrsona no ta bira adikto di droga. "No purb'é mes, ni un biaha!" ta nos konseho.

Klaramente nos ta rechasá nos propio konseho i argumentonan. Nos ta enfátiko ora nos ta instruí nos hóbennan pa ku droga. Nos ta deklará ku siguransa ku ora ta trata ku droga e hóbèn **mester** bisa un palabra simpel di dos lèter, "Nò!" Ademas ripará ku nos tin e kurashi pa proklamá kategorikamente ku e hóbèn mester bisa "Nò!" **tur biaha**, sin eksepsion!

Pakiku nos no por siña for di nos propio programa kontra droga ora ta trata di sèks fuera di matrimonio? Pakiku nos ta eksigí pa nos hóbennan ehersé disiplina propio pa ku droga, anto nos ke sa ku nan ta inkapas pa tin e abilidadat pa hasi méskos pa ku sèks? Pakiku nos ta asina "naif" ku nos ta aseptá e argumento apsurdo ku hóbennan lo hasi sèks tòg p'esei mester siña nan hasié responsabel? Pakiku nos no por siña nos yunan pa bisa "Nò!"—**tur biaha**—pa ku tur relashon seksual fuera di matrimonial? Pakiku nos ta para riba pa nan mantené siertu norma di moralidat den un kaso, ma no den un otro? Pakuku nos no por eksigí apstinensia i puresa moral pa nan propio bienestar, salú, i asta nan bida?

MORALIDAT TA KRUSIAL

Ora bo ta kumpra un outo nobo, bo ta haña e manual di e fabrikante huntu ku bo outo. E fabrikante di outo sa kiku ta mihó pa e funshonamentu optimal di bo outo. Si bo ta sigui su instrukshon, lo bo eliminá hopi problema ku bo outo. Ma bo ta buska problema pa bo outo i pa bo mes si bo ta ignorá òf ta violá su konseho!

Dios siendo nos Kreador, sa presis kon hende por funshoná optimal. P'esei El a duna nos un Manual tambe, Beibel. Si nos ta sigui e instrukshon di Su Manual, nos lo evitá tur klase di problema. Ma méskos ku e fabrikante di outo, Dios no ta obligá ningun hende di sigui e instrukshon den Su Manual. Pero si nos ta ignor'é i viol'é, nos por sa sigur ku dia lo yega ku nos lo kosechá e konsekuensianan.

Pa 3500 aña kaba Beibel ta promové i eksigí puresa moral! Durante tur e siglonan aki, tin periodo di tempu ku hende a mantené nan segun e stèndèrt aki, i komo resultado a prosperá. Tambe tin ripitído ehémpel di eranan ku hende a violá Dios Su mandamentunan i a sufri e konsekuensianan. Ta un echu dokumentá ku komportashon seksual tin un laso estrecho pa ku e sobrevivensia di un nashon

E antropólogo sosial británico, J.D. Unwin, tabata e promé pa trese esaki na klaridat. Pa shete aña el a hasi un estudio ekstensivo di e nasementu i morto di 80 sivilisashon.

For di su estudio el a nota ku kada kultura den historia di mundu a sigui e mésun patronchi seksual. Na komienso di su eksistencia, durante su infansia, tur relashon seksual promé òf fuera di matrimonio tabata striktamente prohibí. E mésun periodo di tempu aki tabata karakterisá pa energia kreativo, resultado den prosperidat pa e nashon.

Ma ku tempu, e suidananon a kuminsá rebeldiá kontra e prohibishonnan rígrado, i a demandá mas libertat pa ekspresá nan pashonnan manera nan ta haña ta bon. Ma ku e debilitashon di moralidat, e energia sosial tambe a ser stanká guiando eventualmente na e dekadensia òf destrukshon di e sivilisashon.

Dr. Unwin a deklará ku e energia ku ta mantené un komunidad intakto i salú ta di índole seksual. Ora un hòmer ta deboto na ún (1) muhé i ún (1) famia, e ta motivá pa konstruí, spar, protehá, plania, i prosperá pa nan bienestar. Sinembargu, ora su interes seksual ta plamá i generalisá, su esfuersonan ta dediká pa sasia su propio deseonan sensual.

E antropólogo sosial a yega na e siguiente konklushon: "Kada sivilisashon humano ta liber pa demonstrá gran energia òf pa gosa libertat seksual; e evidensia ta (demonstrá) ku nan no por hasi tur dos pa mas ku un generashon."

Klaramente moralidat ta importante. Nò, puresa moral ta mas ku importante; e ta krusial!

NO MALKOMPRENDE—SÈKS TA BON!

Tempu ku hopi di nos a lamta, un silensio mortal a reina pa ku e tópiko di seksualidat. Komo resultado, hopi hende a lamta ku e pensamentu ku sèks ta un tópiko ku mester keda kubrí den un skuridat eternu, un tópiko tabú, muchu intimo pa papia. Ku bèrgwensa mayornan a papia di "e kos" na lugá di usa palabranan korekto.

Misa tambe a multipliká e sekresia. Predikashinan ku a "grabatá unda ta kishikí" riba e tópiko aki, tabata sumamente skars. Pastornan ku a riska menshoná seksualidat a blos i hasi tur klase di maniobra vèrbal pa evitá di papia muchu kla. Resultado di e sermonnan sensurá tabata ku hopi hende no a haña kontesta pa nan preguntanan, òf pió a yega na konklushonnan inkorekto òf asta destruktivo.

Ku e eksploshon di informashon tokante seksualidat awendia, e tópiko tabú ta papiá na un forma eksplisito riba kaya, na trabou, na skol, na televishon, dilanti hues, den músika...kasi tur kamina. Tur kamina, ku eksepshon di nèt e lugánan unda ta mas importante pa papi'é: na kas i iglesia. Komo resultado, hopi hende ta kana ku un impreshon kiboká. Nan ta kere ku un denunsia di sèks tras di otro ta yena e páginanan di Beibel; ku Dios tin un rabia riba tur relashon seksual. Ma e idea ei ta leu di bèrdat! Ta tempu pa nos proklamá na bos haltu pa tur hende sa: **segun Dios, sèks ta bon!**

Pa algun hende un deklarashon asina ta sakrilegio i blasfemoso, kousando un atake di kurason formal! Ma echu ta ku e mensahe aki ta resoná kla den e páginanan di santu Skritura. Ripará kuater punto importante tumá for di Beibel

Pa di promé, nos tin ku realisá ku e idea di sèks a orginá ku ningun otro persona sin **Dios mes!** Dios por a krea hende kualke manera ku E tabata ke, i El a skohe pa krea hende komo sernan seksual! "Segun imagen di Dios El a krea hende. El a krea nan hòmer i muhé" (Génesis 1:27). Sèks ta **Dios** Su invenshon! Dios a krea dos sekso distinto.

Tambe nota ku maske Dios por a krea e órganonan seksual kualke manera òf forma ku E tabata ke, El a skohe pa krea esakinan distinto di tal forma ku nan por armonisá ku otro. Esei tambe tabata **Dios** Su idea!

Ma esei no ta tur! E di tres punto pa nota ta ku Dios a pone den tur dos sekso e deseo pa uni ku otro. Despues di adolesensia, mayoria hende ta anhelá pa relashon seksual. E deseo ei no ta

piká. Dios ta Esun ku a krea e deseo ei den hende. Sin e deseo aki, mundu lo tabatin un problema ku poblashon...un skarsedat enorme.

E di kuater opservashon ta ku **Dios asta a duna òrdu** pa e hòMBER i muhé kasá uni huntu na un forma seksual. Despues di kreashon, Dios a bisa Adam i Eva: "Sea fruktífero i multipliká, yena mundu..." (Génesis 1:28). Ta bon pa nota ku Dios no a duna e mandamentu pa ku relashon seksual solamente pa e proposito pa hende haña yu. Dios a krea sèks pa plaser! "Alegrábo den e esposa di bo hubentut...laga su pechunan satisfasébo tur ora; sea enkantá sèmper ku su amor" (Provèrbionan 5:18-19). Ku esaki en bista, ta notábel ku I Korintionan 7:1-5 ta kita tur duda ku relashon seksual ta **Dios Su mandamentu** pa hende kasá. "Laga e esposo kumpli ku su deber di matrimonio ku su esposa, i méskos tambe e esposa pa ku su esposo...**stòp di nenga otro**..." Dios nunca ta duna un mandamentu pa hasi algu ku no ta bon!

Laga nos saka tur idea kiboká for di nos kabes. Skritura santu ta laga sa enfátikamente ku sèks ta Dios Su idea i invenshon, ku sèks ta plasentero, ku sèks ta dushi, ku sèks ta santu, i den matrimonio, sèks ta bon!

MA FUERA DI MATRIMONIO...

Ma e mésun Dios ku e krea dos sekso distinto ku ta armonisá ku otro, i a pone den nan e deseo pa uni ku otro, i asta a duna mandamentu pa nan hasi esei, e mésun Dios aki—sabiendo loke ta lo mihó pa hende, sabiendo di e disaster ku sèks fuera di matrimonio por kousa—a duna mandamentu bon kla pa relashon seksual keda **solamente den matrimonio!**

Dios a duna mandamentu pa tin relashon seksual **solamente** segun Su reglanan! Un piská den akuario ta haña alimentashon i kuido. E ta den un ambiente protehá meimei di e kuater glasnan. Ma suponé ku un dia e piská ta wak dor di e glas i ta opservá tantu aktividat interesante pafó di e akuario. E ta kuminsá pensa kon dushi bida lo mester ta na otro banda di e glas. E tambe ke gosa i partisipá den e bida ei. E ta despresiá e restriksion ku e glas ta imponé. P'esei un dia e ta bula afó di e akuario, kai riba flur...i pronto ta muri. Muchu lat e ta bin komprendé ku e glas ku a limit'é, tabat'ei nètamente pa su bienestar i protekshon.

Igualmente, Dios ta duna limitashonnan **pasobra E ta stima nos!** E limitashonnan ta pa nos protekshon. Dios Su reglanan pa ku seksualidat ku tantu hende ta despresiá, di bèrdat ta eksistí pa nos bienestar.

Pensa un ratu tokante Dios Su restriksionnan pa ku seksualidat. Kiku nan ta? Skritura santu ta indiká ku relashon seksual mester ser mantené solamente meimei di e siguiente tres "glasnan" di restriksion.

Pa di promé, relashon seksual mester ta **heteroseksual**. Maske algun hende ta trose tekstonan di Beibel pa nan konbinensia, tòg ta sali bon na kla ku Dios ta aprobá di relashon seksual solamente entre ún (1) hòMBER i ún (1) muhé. Tur otro akto seksual—homoseksualidat, lèsbian, bestialidat, èts.—ta un abominashon den bista di nos Kreador.

E relato bíblico di kreashon, haña den Génesis 1-2, ta mustra kla ku heteroseksualidat ta Dios Su òrdu. Dios a krea ún hòMBER i ún muhé. E no a krea Adam i Ivan ni tampoko Madam i Eva. Ademas El a duna nan e mandamentu pa sea fruktífero i multipliká. E úniko manera ku ta pusibel pa kumpli ku e mandamentu aki ta dor di relashon heteroseksual. Ta impusibel pa aktonan homoseksual òf un otro forma di pervershon kumpli ku e mandamentu aki.

Tur akto homoseksual ta prohibí pa nos Kreador. "No ta pèmití pa bo drumi hende hòMBER manera hòMBER sa drumi ku muhé; ta abominashon. Si un hòMBER drumi ku otro hòMBER manera hòMBER sa drumi ku muhé, nan tur dos a kometé un akto abominabel; mester laga mata nan sin falta" (Levítiko 18:22; 20:13). "...ni sodomitanan, ni homoseksual...lo no eredá reino di Dios" (I Korintionan 6:9-10). "...Dios a entregá nan na pashonnan bèrgonsoso, pasobra nan muhénan a

kambia nan funshon natural pa loke ta kontra naturalesa, i di e mésun manera tambe e hòmbènan a bandoná e funshon natural di muhé i a kima den nan pashon un pa otro; hòMBER ku hòMBER ta kometé aktonan indesente i ta risibí den nan mes persona e kastigu meresí pa nan eror” (Romanonan 1:26-27). Ta klaro ku Palabra di Dios ta kondená aktonan homoseksual i biseksualidat komo piká.

E di dos restriksyon ta ku relashon seksual no por ta pre-matrimonial. Dios Su mandamentu ta fási pa komprendé riba e punto aki: relashon seksual mester warda te matrimonio. “Ma no laga immoralidat òf kualke sorto di impuresa...wòrdu mentá mes meimei di boso...” (Efesionan 5:3). “...boso apstené boso di immoralidat seksual” (I Tesalonisensenan 4:3). “..kurpa no ta pa immoralidat..Hui for di immoralidat...e hende immoral ta peka...” (I Korintionan 6:13,18).

Dios Su instruksyon na esnan ku no ta kasá **no** ta, "Pobersitonan. Mi ta komprendé pa boso. Boso hormonanan ta pidi sèks. P'esei ora bo ta hasi sèks, sòru ku e ta seif. Usa kondom!" Nò! Dios Su mandamentu ta kategórikò i kla: apstenensia! Puresa moral ta loke Dios ta demandá!

Un teksto ku ta papia hopi franko tokante seksualidat ta I Korintionan 7. “Ma pa motibu di immoralidat, laga kada hòMBER tin su mes esposa, i laga kada muhé tin su mes esposo. Ma mi ta bisa e solteronan i biudanan...si nan no tin dominio propio, laga nan kasa, pasobra ta mihó kasa ku kima di pashon.” (7:2,8-9).

Ningun kamina den Beibel Dios ta baha Su stèndèrt. Konkubinato, esta bibamentu huntu sin ta kasá, ta un piká ku Dios ta odia. Maske esaki a para bira un kos di kustumber i hende ta haña esaki masha normal, Dios no ta kambia di opinion. E ta keda immoralidat! Prostitushon, violashon, inestu, i abuso seksual tambe ta kai bou di e mésun kondenashon di Dios!

E di tres restriksyon ta Dios Su eksigensia pa matrimonio ta monógamo. Sèks den matrimonio ta bon. Pero Dios no ta pèrmití kortamentu di orea, otro amante òf baisait. "Laga matrimonio wòrdu onrá pa tur hende, i laga e kama matrimonial ta sin mancha; pasobra Dios lo huzga fornikadónan i adúlteronan” (Hebreonan 13:4). Un di e dies mandamentunan ta deklará kategoriakamente, "No kometé adulterio" (Exodo 20:14). Ademas Palabra di Dios ta mustra kon serio e piká aki ta ora Tèstament Bieu ta deklará, "Si un hòMBER kometé adulterio ku esposa di otro hòMBER—ta kometé adulterio ku esposa di su amigu—mester laga mata tantu e hòMBER komo e muhé ku a kometé adulterio, sin falta" (Levitiko 20:10).

Sèks ta algu muchu intimo, muchu presioso, muchu sagrado pa kompartí ku kualke ken ku ta. P'esei Dios ta para riba ku mester warda te ora e dos personanan ta totalmente dediká na otro i ta demonstrá esaki dor di uni den matrimonio promé ku por inisiá relashon seksual. Ta solamente bo kasá ku ta permití di yena bo nesidat seksual. Dios Su eksigensia ta un solo partner seksuual bida largu. Morto di bo kasá so ta hasié pusibel pa tene relashon seksual ku un otro persona, ma solamente despues di mara e laso matrimonial pa segunda bes. Tur otro kontakto seksual ta kontrario di Dios Su plan i boluntat i ta piká.

VIOLASHON DI PURESA MORAL

Algun hende tin e impreshon ku Dios a prohibí relashon seksual fuera di matrimonio pa prevení hende di gosa muchu. Dios ke pa nos bida ta laf, serio, sin sous, i p'esei E ta eksigí apstenensia te kasamentu. Ma esei ta puru mentira, leu di e bèrdat! Dios ta eksigí pureza moral nètamente **pasobra** E ta stima nos! Kada mandamentu moral di Dios ta deseñá pa protehá òf proveé pa hende. Obedensia na Dios Su reglanan ta hasié pusibel pa gosa bida. Bo salú i asta bo bida por dependé di bo obedensia na loke Dios a bisa!

Dios sa ku apstinensia promé ku matrimonio i fieldat den matrimonio ta e úniko plan efektivo kontra enfermedat venérikò i ta masha importante pa un matrimonio felis. Si hende lo a obedesé Dios Su mandamentu, e epidemia venérikò sekretu ku ta eksistí aktualmente lo no ta un realidat. Nos ta simplemente kosechá e fruta marga ku nos mes a planta.

Nos tin e libertat pa ignorá i violá e reglanan ku nos Kreador a duna. Ma tempran òf lat lo nos sufri e konsekuensianan. Suponé ku bo ta tuma lès pa siña usa parashut. Despues di haña tur e instrukshon teorétiko, ta tempu pa pone e informashon na praktika. Bo ta pronka ku e fahanan i kabuyanan te porfin bo ta fada. Kasi e avion ku ta transportábo ta yega e lugá unda bo mester bula ora bo ta kuminsá lès e parashut. E instruktor ta puntrábo kiku bo ta hasi. Bo ta respondé, "E fahanan i kabuyanan tin mi kansá. Nan ta restringí mi libertat! Mi ke ta liber. Mi ke eksperensia kon dushi e ta pa bula den laira sin tur e restriksionnan fastioso ku ta marámi."

Bo ta liber pa bula for di avion sin parashut! Ma bo lo no ta liber di e konsekuensianan di bo desishon kontrario di lei di gravedat. Nèt loke bo ta kere ta libertat bèrdadero ta resultá di ta bo destrukshon.

Di igual manera, bo por bandoná tur Dios Su reglanan i eksperensia "libertat" seksual! Pero méskos ku esun ku ta bula sin parashut, lo bo no ta liber di e konsekuensianan...konsekuensianan penoso!

Nos ta bisa muchanan ku ta hunga ku lusafè, "Si bo hunga ku kandela, kandela lo kimábo." Dios a komuniká e mésun bèrdat. "Un hende por tuma kandela den su skochi sin kima su paña? Of un hende por kana riba karbon kayente sin kima su pia? Asina ta esun ku drumi ku esposa di su próhimo; ken ku mishi kuné no ta keda sin haña kastigu" (Provèrbionan 6:27-29). Dios no ta gaña! Esun ku ta mishi ku kandela, lo kima. Mes sigur, tin konsekuensia doloroso pa esun ku ta kere ku e por hunga e wega di sèks.

Bo sa ku Dios ta prohibí sèks fuera di matrimonio. Bo por ignorá Dios Su mandamentu, ma e konsekuensianan di bo desobedensia lo no ignorá bo! Bo no por gosa sèks ku kualke ken ku bo ta haña bon sin sufri e konsekuensianan. Enfermedatnan venérikos ta solamente **un** di vários konsekuensia di piká. (Den e estudio aki nos no ta trata ku e konsekuensianan spiritual, sikológiko, emoshonal, sosial, èts.)

E dos palabranan "enfermedat venérikos" riba nan mes ta un kontradikshon. E palabra "venérikos" ta originá ku e diosa romano di amor, Venus. Kon iróniko ku hende, ignorando e instrukshon di Dios pa nan tin ún partner seksual so bida largu, a buska amor serka otro hende fuera di nan propio kasá. Ma den hopi kaso, e búskeda pa amor a okashoná enfermedat. Hende a rebahá i trose loke Dios a deseña komo un ekspreshon di amor puru, i a pone sensualidat egoista na su lugá a yam'é amor, i a kosechá e fruta marga di enfermedat. Di bèrdat, enfermedat venérikos ta nada mas ku un enfermedat kousá pa un amor falsu.

P'ESEI...

Ta tempu pa nos stòp di gaña nos mes, hungando e wega peligroso di kondom. Ta tempu pa nos skohe Dios Su solushon pa AIDS i enfermedat venérikos: puresa moral; esta birginidat i apstinensia te matrimonio, anto fieldat den matrimonio. Esaki ta loke ta salú, sano, i normal! Esaki ta e úniko medida efektivu kontra AIDS i otro enfermedatnan venérikos.

Ma talbes bo ta bisa, "Ya kaba mi a frakasá. Mi ta seksualmente aktivo sin ta kasá. Mi no ta moralmente puru mas. Kiku mi por hasi?"

Tin speransa pa bo! Pa di promé, realisá ku si bo ta sigui tene relashon seksual ku bo amante aktual, e porsentahenan ta indiká ku ta probabel ku eventualmente lo bo kibra kun'é. Hende ku ta hasi sèks ku un amante normalmente lo sigui e mésun patronchi ku e siguiente amante, i esun ku ta sigui despues. Pues, ku bo sistema di biba, bo rísiko di kontagiá un enfermedat venérikos ta hopi grandí. P'esei ta urgente pa bo pone un paro na tur kontakto seksual.

Una bes ku bo a tèrminá tur aktividat seksual, bo por gosa loke nos por yama "birginidat sekundario," esta, un di dos chèns pa kuminsá di nobo! Bèrdat, bo frakasá. Pero bo no tin mester sigui den e mésun kamina malu pasobra bo tin un historia di frakaso! Hasi promesa na

Dios ku kuesta loke kuesta lo bo evitá tur kontakto seksual te dia ku bo ta kasa. Algun asta ta bisti un renchi òf un kadena komo un rekordatorio di e promesa aki.

Mayornan mester kambia nan sistema di pensa. Nan mester kontradisí e mensahe mentiroso ku ta indoktriná nan yunan diariamente ku "safe-sex" ta realisabel dor di uso di kondom. No laga bo yu pa su kuenta pa e disidí pa su mes ki tempu i ku ken e lo skohe pa eksperensia sèks. Alkontrario, instruíe for di awor, siñ'é pa e warda te matrimonio. Mustr'e ki un regalo presioso birginidat ta pa presentá su futuro kasá e anochi di kasamentu. Promové apstենensia komo e úniko alternativa faktibel. Yud'é para kontra e tentashonnan fuerte ku e ta enfrentá.

I kisas riba tur otro kos, mayornan mes mester duna un ehèmpel positivo di puresa moral. Bo por papia masha bunita. Ma si bo ta kòrta orea di bo kasá, si bo tin un amante, no pensa ku bo yu lo keda den un kamina moral. Bo no por siña bo yu pa kana den un bon kamina si bo mes bai den un direkshon robes!

Ademas, ta tempu pa nos skolnan stòp di promové e mentira ku kondom ta e salbabida, ku e ta garantisá "safe-sex." Direktiva di kada skol tin ku hasi un desishon: kua mensahe nan ke pa nan alumnonan tende: "safe-sex" basá riba kondom òf apstենensia. Mester ta un òf e otro. Ta impusibel pa siña tur dos pareu, pasobra edukashon tokante sèks ku ta promové apstենensia i edukashon seksual ku ta promové "safe-sex" ta mutualmente eksklusivo.

Skolnan ku ta duna instrukshon pro apstենensia ta nota ku e kantidat di alumno femenino ku ta sali na estado ta baha. Maske algun studiante ku ta haña instrukshon tokante apstենensia tòg ta skohe pa sigui tene relashon seksual, tòg e porsentahe grandi ta indiká ku nan a logra resistí kontra e tentashon pa ta seksualmente aktivo.^T2^T

Kada aña miles di florin ta ser gastá pa promové kondom. Sinembargu e epidemia di enfermedat venérikò ta sigui eskalá i alumnonan femenino ta sali na estado ku mes òf asta mas frekuensia. Ta tempu pa gobernantenan realisá ku e sèn ku nan ta basha den e pos di "safe-sex" ta un pos sin bòm; e no ta duna e resultado deseá.

Ta tempu pa nos gobernantenan evaluá kiku nan ta hasi. Ta tempu pa nan ta onesto ku nan mes i stòp di hunga ku e salú i bidanan di nan paisanonan dor di pèrmití e mensahe di "safe-sex" ser propagandá na lugá di apstենensia.

Moralidat ta un plan simpel, un plan ku no ta kosta gobièrnu ni un depchi, ma tòg e ta un plan ku ta sumamente efektivu! Ta bon pa nos realisá ku dor di historia, un sivilisashon tras di otro a purba desviá di e plan aki. E resultado tabata desastroso pa nan mes! Tempran òf lat nos tambe lo mester aseptá e plan aki—si nos ke si òf nò! Hopi sivilisashon a purba i no a logra. Nos tampoko no por skapa! E pregunta ku ta keda: kuantu di nos yunan lo nos mester dera promé ku nos ta spierta for di nos soño i realisá ku puresa moral—no kondom—ta e úniko solushon pa AIDS i enfermedat venérikò?